

庶徵典

庶徵典第一百七十二卷

馬異部彙考一

漢書 五行志

傳曰皇之不極是謂不建厥咎眊厥罰恆陰厥極弱時則有射妖時則有龍蛇之孽時則有馬禍于易乾爲君爲馬馬任用而強力君氣毀故有馬禍一曰馬多死及爲怪亦是也

宋書 符瑞志

龍馬者仁馬也河水之精高八尺五寸長頸有翼傍有垂馬毛鳴聲九音 騰黃者神馬也其色

黃王者德御四方則出白馬朱鬣王者任賢良則見 澤馬者王者勞來百姓則至夏馬駟黑身

白鬣尾殷馬駱白身黑鬣尾周馬騂赤身黑鬣尾 玉馬王者精明尊賢者則出 飛菟者神

馬之名也日行三萬里禹治水勤勞歷年救民之害天應其德而至 騶虞者神馬也與飛菟同

亦各隨其方而至以明君德也

魏書 靈徵志

鴻範論曰馬者兵象也將有寇戎之事故馬爲怪也

管窺輯要 馬占

白馬赤鬣王者任用賢良乘服有度則至

馬食沙石將勇士強攻伐必勝

馬羣鳴朝朝乃

是豪王之聲軍宜遠行深入戰必勝馬悲鳴有大憂馬夜鳴有外兵來馬蹋地不食而鳴將有千里之行戰長長鳴晨夜不息暴敵將至馬驢不食草而繞宅啼鳴有喪禍凶事馬忽拒主嘶鳴人口分散軍馬乘困而悲鳴有思鄉之聲軍退不退軍敗 馬數視其蹄臣下強不肯行陣內自凶殃一

曰兵亂

馬逸入宮大臣不受主命其鳴也主令不行臣奪主位京房占曰有兵事主死國亂亡

上馬之際忽頭齧人足鐙或觸人衣裳下有陰謀有成

馬易毛京房曰名曰易衣君有憂有更

令家人之馬則死其家長握鏡占曰馬忽易色有大喪馬一夕改尾國易政

馬作人言是謂亂

國之妖善惡如其言

馬生角其君以用兵敗亡京房曰下不順政厥妖馬生角茲謂賢士不足

又曰馬生角天子自將征伐

馬化爲牛君且無兵馬化爲狐其國不昌

牡馬生駒京房曰方伯分威厥妖牡馬生駒

馬生子三足大臣非才不勝其任馬生子無尾兵

起國弱君亡後一目君弱在軍中其將弱生子三目以上臣制主命二口以上其國政亂三鼻以上民流亡三耳以上人多死二足人流亡政令不行軍不用命三足其邑主者亡二陰以上有兵

馬生子目在腹下及左右其邑有兵目在四肢其邑人且爲俘囚目在陰其邑大弱主亡目在背下不從殺人流血生子口在背民去其君凶口在腹穀貴民饑耳鼻在四肢兵起耳鼻在腹及背臣謀君憂足在首君失邑在背人主有遠行在腹主勞民饑尾在首足穀不成在背君不安在腹臣謀叛馬生子無目國君久疾無口鼻君無子無耳失聰無足君失位無尾兵起國弱君亡後

馬生人京房曰上無天子諸侯相伐民流百姓勞厥妖生人生人一身兩首以上邑有叛兵一身三首邑相挽爲亂一首二顙邑有大兵一身三首以上或無目三耳以上或多口多耳或無口鼻皆爲兵饑不祥有臂無足邑兵敗三臂以上君有惡疾三足以上其邑大勞三陰以上臣謀主 馬生人首在腋下臣弑其主首在足下君死國亡首在背民大苦在陰君亡地生人目在腋下其君哭目在背邑有大兵民流亡在腹若喉顙君失地在足下下人謀上生人口在腹邑有兵人饑口在背邑有大事民絕食生人鼻在腹下主令不行在足下民哭相從在腹其邑穀不成在脇民勞在陰鬼神

不享君祀生人耳在背民不從邑有兵耳在腹其邑弱主令不行耳在陰賢者不上通生人陰在上其主無子陰在背腹民饑臣謀上四肢在首及項其君失位

馬生人無首其君疾病無目君失

位國亡無口大饑無鼻其邑有喪無耳有鬼驚人生無手足邑不穀無臂邑敗無腹兵饑國亡

馬生人人身六畜面民饑主易人身六畜中邑有兵人面野獸身邑國有兵人面蛇首其國邑亡人面天下有亡國人面鳥首其國邑有兵人身蛇首其國邑亡人面蟲身有大喪其邑國爲墟人身龍首主弱不治人面龍身民流亡五行傳曰子孫必有非姓者

馬生他畜國有大事生羊邑國大

安生牛五穀昌人安生他畜一首兩身其國君亡生他畜二口以上天下有爭兵三鼻以上民大饑三目三耳以上社稷亡生六畜無首君失位無四足君危不安無目臣蔽主明君令不行無鼻口天下有兵無耳君失忠臣無陰女主亂

馬生野獸有他變形皆爲兵喪

馬生魚邑主憂有大

水五穀不成大饑

馬生蛇蟲邑有流亡

馬生五穀京房曰歲美人安

馬生金鐵邑人

謀賊上

馬生石其國兵強

馬生土君益地

馬生布帛有更令

周

敬王二十年宋奪公子地之馬公子地公子辰叛 按春秋不書 按漢書五行志左氏傳定公十年宋公子地有白馬駟公嬖向魋欲之公取而朱其尾鬣以予之地怒使其徒扶魋而奪之魋懼將走公閉門而泣之目盡腫公弟辰謂地曰子爲君禮不過出竟君必止子地出奔陳公弗止辰爲之請不聽辰曰是我廷師古曰廷欺也吾兄也吾以國人出君誰與處遂與其徒出奔陳明年俱入於蕭以叛大爲宋患近馬禍也

顯王二十八年

卽秦孝公二十一年

秦有馬生人

赧王二十八年

卽秦昭王二十年

秦有牡馬生子而死

按史記周本紀不載

按漢書五行志史記秦孝

公二十一年有馬生人昭王二十年牡馬生子而死劉向以爲皆馬禍也孝公始用商君攻守之法東侵諸侯至於昭王用兵彌烈其象將以兵革抗極成功而還自害也牡馬非生類妄生而死猶秦恃力强得天下而還自滅之象也一曰諸畜生非其類子孫必有非其姓者至於始皇果呂不韋子京房易傳曰方伯分威厥妖牡馬生子亡天下諸侯相伐厥妖馬生人

漢

文帝十二年吳有馬生角 按漢書文帝本紀不載 按五行志十二年有馬生角於吳角在耳前上鄉右角長三寸左角長二寸皆大二寸劉向以爲馬不當生角猶吳不當舉兵鄉上也是時吳王濞封有四郡五十餘城內懷驕恣變見於外天戒早矣王不悟後卒舉兵誅滅京房易傳曰臣易上政不順厥妖馬生角茲謂賢士不足又曰天子親伐馬生角

武帝元鼎四年馬生渥洼水中 按漢書武帝本紀元鼎四年秋馬生渥洼水中作天馬之歌

成帝綏和二年馬生角 按漢書成帝本紀不載 按五行志綏和二年二月大廐馬生角在左耳前圍長各二寸是時王莽爲大司馬害上之萌自此始矣

哀帝建平二年牡馬生駒三足 按漢書哀帝本紀不載 按五行志哀帝建平二年定襄牡馬生駒三足隨羣飲食太守以聞馬國之武用三足不任用之象也後侍中董賢年二十二爲大司馬居上公之位天下不宗哀帝暴崩成帝母王太后召弟子新都侯王莽入收賢印綬賢恐自殺莽因代之并誅外家丁傅又廢哀帝傳皇后令自殺發掘帝祖母傳太后母丁太后陵更以庶人葬之辜及

至尊大臣微弱之禍也

後漢

桓帝延熹五年驚馬逸象突入宮殿 按後漢書桓帝本紀不載 按五行志桓帝延熹五年四月驚馬逸象突入宮殿近馬禍也是時桓帝政衰缺

靈帝光和元年馬生人 按後漢書靈帝本紀光和元年京師馬生人 按五行志靈帝光和元年司徒長史馮巡馬生人京房易傳曰上亡天子諸侯相伐厥妖馬生人後馮巡遷甘陵相黃巾初起爲所殘殺而國家亦四面受敵其後關東州郡各舉義兵卒相攻伐天子西移王政隔塞其占與京房同

光和 年雒陽馬齧殺人 按後漢書靈帝本紀不載 按五行志光和中雒陽水西橋民馬逸走遂齧殺人是時公卿大臣及左右數有被誅者

魏

齊王嘉平 年東郡訛言河出妖馬 按魏志齊王本紀不載 按晉書五行志魏齊王嘉平初東

郡有訛言云白馬河出妖馬夜過官牧邊鳴呼衆馬皆應明日見其跡大如斛行數里還入河楚王彪本封白馬兖州刺史令狐愚以彪有智勇及聞此言遂與王淩謀共立之事泄淩愚被誅彪賜死此言不從之罰也詩云人之訛言寔莫之懲

晉

武帝太熙元年馬生角 按晉書武帝本紀不載 按五行志太熙元年遼東有馬生角在兩耳下長三寸按劉向說曰此兵象也及帝晏駕之後王室毒於兵禍是其應也京房易傳曰臣易上政不順厥妖馬生角茲謂賢士不足又曰天子親伐馬生角呂氏春秋曰人君失道馬有生角及惠帝踐祚昏愚失道又親征伐成都是其應也

惠帝元康八年皇太子駕車馬止不動 按晉書惠帝本紀不載 按五行志元康八年十二月皇太子將釋奠太傅趙王倫驂乘至南城門馬止力士推之不能動倫入輅車乃進此馬旤也天戒若曰倫不知義方終爲亂逆非傳導行禮之人也

元康九年有牡馬驚奔至廷尉堂悲鳴而死 按晉書惠帝本紀不載 按五行志九年十一月戊

寅忽有牡驪馬驚奔至廷尉訊堂悲鳴而死天戒若曰愍懷冤死之象也見廷尉訊堂其天意乎

懷帝永嘉六年神馬鳴 按晉書懷帝本紀不載 按愍帝本紀帝歸長安時有神馬鳴城南焉

按五行志永嘉六年二月神馬鳴城南門

愍帝建興二年馬生人 按晉書愍帝本紀建興二年蒲子馬生人 按五行志建興二年九月蒲

子縣馬生人京房易傳曰上亡天子諸侯相伐厥妖馬生人是時帝室衰微不絕如線兵戈日逼尋而帝亦淪陷故此妖見也

元帝大興二年馬生駒二頭 按晉書元帝本紀不載 按五行志大興二年丹陽郡吏濮陽演馬生駒兩頭自項前別生而死司馬彪說曰此政在私門二頭之象也其後王敦陵上

成帝咸康八年有赤馬逸入殿前莫知所在 按晉書成帝本紀不載 按五行志咸康八年五月甲戌有馬赤色如血自宣陽門直走入於殿前盤旋走出尋逐莫知所在己卯帝不豫六月崩此馬禍又赤祥也是年張重華在涼州將誅其西河相張祚廐馬數十匹同時悉無後尾也

安帝隆安四年馬生角 按晉書安帝本紀不載 按五行志隆安四年十月梁州有馬生角刺史

郭銓送示桓元按劉向說曰馬不當生角猶元不當舉兵向上也元不悟以至夷滅

宋

孝武帝大明三年西域獻舞馬 按宋書孝武帝本紀大明三年十一月己巳西域獻舞馬

南齊

明帝建武 年有馬食女子肉 按南齊書明帝本紀不載 按五行志建武中南岸有一蘭馬走逐路上女子女子窘急走入人家牀下避之馬終不置發牀食女子股腳間肉都盡禁司以聞敕殺此馬是後頻有寇賊

梁

武帝太清元年神馬出 按南史梁武帝本紀太清元年四月神馬出皇太子獻寶馬頌

陳

宣帝太建五年馬生角 按陳書宣帝本紀太建五年三月景戌西衡州獻馬生角

北魏

高宗興光元年馬生角 按北史魏文成帝本紀興光元年九月庫莫奚國獻名馬有一角狀如麟
肅宗熙平二年馬生肉尾 按魏書肅宗本紀不載 按靈徵志熙平二年十一月辛未恆州送馬
駒肉尾長一尺驥處不生毛

正光元年蟲入馬耳馬多斃 按魏書肅宗本紀不載 按靈徵志正光元年九月沃野鎮官馬爲
蟲入耳死者十四五蟲似蠅長五寸已下大如櫓

出帝永熙三年馬自死 按北史魏孝武帝本紀永熙三年閏十二月癸巳潘彌奏言今日當甚有
急兵其夜帝在逍遙園宴阿至羅顧侍臣曰此處彷彿華林園使人聊增悽怨命取所乘波斯驪馬
使南陽王躍之將攀鞍蹶而死帝惡之日晏還宮至後門馬驚不前鞭打入謂潘彌曰今日幸無他
彌曰過夜半則大吉須臾帝飲酒過醺而崩

北周

明帝武成元年四月甲戌秦州獻白馬朱鬣 按周書明帝本紀云云

隋

恭帝義寧二年馬生角 按隋書恭帝本紀不載 按唐書五行志義寧二年五月戊申有馬生角長二寸末有肉角者兵象

唐

高祖武德三年馬生角 按唐書高祖本紀不載 按五行志武德三年十月王世充僞左僕射韋霽馬生角當頂

太宗貞觀二年九月甘州獻白馬朱鬣 按唐書太宗本紀不載 按玉海云云

貞觀十三年三月廐產白馬朱鬣 按唐書太宗本紀不載 按冊府元龜云云

高宗永隆二年馬疫 按唐書高宗本紀不載 按五行志永隆二年監牧馬大死凡十八萬匹馬者國之武備天去其備國將危亡

睿宗文明元年馬生駒二首馬生石 按唐書睿宗本紀不載 按五行志文明初新豐有馬生駒二首同項各有口鼻生而死又咸陽牝馬生石大如升上微有綠毛皆馬禍也

元宗開元二年正月丙寅涼州進朱驪尾白馬 按唐書元宗本紀不載 按玉海云云

開元十二年太原獻異馬駒 按唐書元宗本紀不載 按五行志開元十二年五月太原獻異馬駒兩肋各十六肉尾無毛

開元二十五年駒生肉角 按唐書元宗本紀不載 按五行志開元二十五年濮州有馬生駒肉角

開元二十九年馬生肉鬣鱗臆 按唐書元宗本紀不載 按五行志開元二十九年三月滑州刺史李邕獻馬肉鬣鱗臆嘶不類馬日行三百里 按冊府元龜開元二十九年三月甲申滑州李邕獻馬一匹表云其馬肉鬣鱗臆嘶不類馬聲日行三百里邕任淄青刺史日遇一老翁云聖主將得龍馬以應太平邕遂於青州馬會思家獲而獻之

天寶元年馬生鱗 按唐書元宗本紀不載 按冊府元龜天寶元年六月乙未隴右節度皇甫惟明奏龍支縣人庫狄孝義有馬生龍駒經九旬有九日身有鱗而不生毛臣就簡視時有慶雲五色遙覆馬上久而不散伏望宣付史官從之

德宗建中四年馬生角 按唐書德宗本紀不載 按五行志建中四年五月滑州馬生角

文宗太和九年馬吐珠 按唐書文宗本紀不載 按五行志太和九年八月易定馬飲水因吐珠

一以獻

開成元年馬生角 按唐書文宗本紀不載 按五行志開成元年六月揚州民明齊家馬生角長

一寸三分以獻

武宗會昌元年馬生駒三足 按唐書武宗本紀不載 按五行志會昌元年四月桂州有馬生駒

三足能隨羣于牧

懿宗咸通三年馬生角 按唐書懿宗本紀不載 按五行志咸通三年郴州馬生角

咸通十一年牡馬生子 按唐書懿宗本紀不載 按五行志咸通十一年沁州綿上及和川牡馬

生子皆死京房易傳曰方伯分威厥妖牡馬生子

僖宗乾符二年馬生人 按唐書僖宗本紀不載 按五行志乾符二年河北馬生人

中和元年馬生人 按唐書僖宗本紀不載 按五行志中和元年九月長安馬生人京房易傳曰

諸侯相伐厥妖馬生人一曰人流亡

中和二年馬生角 按唐書僖宗本紀不載 按五行志中和二年二月蘇州嘉興馬生角

光啟二年馬尾咤 按唐書僖宗本紀不載 按五行志光啟二年夏四月僖宗在鳳翔馬尾皆咤

蓬如簪咤怒象

文德元年馬肘膝生長鬃 按唐書僖宗本紀不載 按五行志文德元年李克用獻馬二肘膝皆有鬃長五寸許蹄大如七寸甌

宋

太宗太平興國三年靈州獻官馬駒足有二距 按宋史太宗本紀不載 按五行志云云

雍熙二年虔州吏李祚家馬生駒足有距 按宋史太宗本紀不載 按五行志云云

雍熙四年馬足如牛 按宋史太宗本紀雍熙四年夏六月鄜州獻馬前足如牛

端拱二年馬生二駒 按宋史太宗本紀不載 按五行志端拱二年夏州民程真家馬生二駒

真宗大中祥符九年馬生赤駒肉尾 按宋史真宗本紀不載 按五行志大中祥符九年十二月

大名監馬生駒赤色肉尾無鬃

徽宗宣和五年馬生角 按宋史徽宗本紀不載 按五行志宣和五年馬生兩角長三寸四足皆生距時北方正用兵

高宗紹興八年海壩有獸如馬夜入民舍 按宋史高宗本紀不載 按五行志紹興八年海壩有海獸如馬蹄鬣皆丹夜入民舍聚眾殺之明日海溢環村百餘家皆溺死近馬禍也

孝宗淳熙五年馬疫 按宋史孝宗本紀不載 按五行志淳熙五年廣西市馬全綱疫死

淳熙六年馬疫 按宋史孝宗本紀不載 按五行志淳熙六年十二月宕昌西馬金州馬皆大疫

淳熙十二年馬生角 按宋史孝宗本紀不載 按五行志淳熙十二年黎雅州獻馬有角長二寸

京房易傳曰臣易上政不順厥妖馬角茲謂賢士不足

光宗紹熙元年丞相乘馬入朝馬忽斃 按宋史光宗本紀不載 按五行志紹熙元年二月丙申

右丞相留正乘馬早朝入禁扉馬斃近馬禍也

寧宗嘉定五年史彌遠馬驚 按宋史寧宗本紀不載 按五行志嘉定五年正月史彌遠入賀於

東宮馬驚墮地衣幘皆敗其額微損事與上同